

**Pemuda PAS: Umno rasis, bukan DAP**  
**MalaysiaKini.com**  
**May 17, 2012**

Dewan Pemuda PAS Wilayah Persekutuan (DPPWP) hari ini mempertahankan DAP - rakan mereka dalam gabungan pembangkang - daripada tuduhan rasis.

Sebaliknya, dewan itu memulangkan gelaran itu kepada Umno dan menyeru ketua penerangannya Datuk Ahmad Maslan yang mengeluarkan kenyataan itu keluar parti bersama orang Melayu lain.

"DPPWP menganggap kenyataan Ahmad seperti meludah ke langit, terpercik ke muka sendiri.

"Sebenarnya Umnolah yang merupakan sebuah parti yang rasis, tidak menghormati kaum lain dan tidak demokratik," kata ketuanya Kamaruzaman Mohamad (*kanan*).

Dalam kenyataannya hari ini, tanpa menyebut secara khusus, Kamaruzaman berkata sifat rasis Umno tergambar dalam kenyataan pemimpin parti Melayu itu.

Ahmad yang juga timbalan menteri di Jabatan Perdana Menteri semalam dilaporkan berkata, tindakan bekas naib pengerusi Tunku Abdul Aziz Ibrahim meninggalkan parti membuktikan Melayu tidak mempunyai tempat dalam parti itu.

Sehubungan itu, sambil mendakwa DAP tidak menghormati kaum lain, Ahmad menyarankan orang Melayu lain dalam parti itu menyusul jejak langkah Tunku Abdul Aziz, lapor *Bernama*.

Ahmad yang berkata tindakan Tunku Abdul Aziz turut mendedahkan sikap sebenar DAP yang hanya bersandiwara apabila mengambil orang Melayu sebagai anggota dan pemimpin parti, konon terbuka untuk semua kaum.